

Jesu o Phunya Tsela Lesireng



SABATHA MANTSIBOEA

Bakeng sa Boithuto ba Beke Ena Bala: *Ba-Heb. 9:24; Exod. 19:3, 4; Ba-Heb. 12:18-21; Lev. 16:1, 2; Ba-Heb. 10:19-22; Ba-Kol. 3:1.*

Teman'a Khopolo: “Hobane Kreste ha a ka a kena sehalalelong se entsoeng ka matsoho, e leng setšoantšo feela sa sa sebele; empa o kene leholimong la sebele, a tle a hlahe joale pel'a sefahleho sa Molimo, sebakeng sa rona” (*Ba-heberu 9:24*).

Ha barutuo a ba khutla Thabeng ea Mehloare, hantle kamor'a hore Jesu a nyolohela leholimong, ba ne ba tletse ka thabo le tlhōlo. Morena le Motsoalle oa bona o ne a nyolohetse boemong ba matla holim'a lefatše 'me o ne a ba memile ho atamela Molimo ka lebitso la Hae ka sebete se fellletseng sa hore Molimo o tla arabela lithapelo tsa bona ho latela seo ba se kopang

(*Johanne 14:13, 14*). Leha ba ile ba tsoela pele lefatšeng, ba hlaseloa ke makhotla a bokhopo, tšepo ea bona e ne e le matla. Ba ne ba tseba hore Jesu o nyolohile ho ea ba lokisetsa bolulo (*Johanne 14:1-3*). Ba ne ba tseba hore Jesu ke Mohale oa poloko ea bona, le hore o phuntse tsela e kenang lehaeng le leholimong ka mali a Hae.

Nyolohelo ea Jesu leholimong ke 'mokataba oa thuto ea Molimo ho Ba-Heberu. E tšoea qaleho ea puso ea Jesu le qaleho ea bosebeletsi ba Hae e le Moprsta e Moholo bakeng sa bona. Qetellong, ebile e le hoa bohlokoahali, nyolohelo ea Jesu e tšoea motsotso oo selekane se secha, se fanang ka tsela eo re ka atamelang Molimo ka eona ka sebete ka tumelo, e theoang. Joale ke monyetla oa rona ho atamela Molimo ka sebete ka Jesu le makhabane a ho loka ha Hae.

**Ihute thuto ea beke ena ho lokisetsa Sabatha sa la 5 Tlhakubele.*

Jesu Kapele ho Ntate

Bala Ba-Heberu 9:24. Ho latela temana ena, sepheo sa nyolohelo ea Jesu leholimong ke sefe?

Molimo o na laetse Iseraele hore ba batona sechabeng ba ee Jerusalema hararo ka selemo ho “itliahisa pel’a Jehova” ka linyehelo. Nako tse neng li beiloe e ne e le mokete oa Paseka, (Mahobe a se nang Tomoso), Mokete oa Libeke (Pentakonta), Mokete oa Mangata (*Exod. 23:14–17, Deut. 16:16*). Paseka e ne e keteka topollo ea Iseraele Egepeta. Pentekonta e ne e keteka kotulo ‘me, ka nako ea Testamente e Ncha, e ne se e amahanngoa le ho fanoa ha molao Sinai. Mokete oa Mangata o ne o keteka tlhokomelo ea Molimo ho Iseraele nakong ea leeto la bona lefeelleng.

Ba-Heberu 9:24 e hlalosa nyolohelo ea Jesu kapele ho boteng ba Ntate. O ile a kena sehalalelong sa leholimo, “sa sebele,” a tle a “hlahe” kapel’a Molimo ka sehlabelo se fetisang (*Ba-Heb. 9:23, 24*)—Mali a Hae ka sebele.

Jesu o phethile mekete eohle ka katleho e hlolang. O ile a shoa ka letstsi la hlekelo ea Paseka ka hora ea borobong, motsotsong oo likonyana tsa paseka li neng li hlajoa ka eona ho etsa sehlabelo (*Johanne 19:14, Matt. 27:45–50*). Jesu o ile a tsooa ka tsatsi la boraro ‘me a nyolohela leholimong ho ea fumana tiisetso ea hore sehlabelo sa Hae se amohetsoe (*Johanne 20:17, 1 Ba-Kor. 15:20*), ha moprista a ne a lokela ho tsoka ngata ea koro e butsoitseng e le thaka-ngoaha (*Lev. 23:10–12*). Ha a nyoloha matsatsi a 40 hamorao ho ea lula letsohong le letona la Molimo ‘me a hlomamise selekane se secha ka tsatsi la Pentakonta (*Liketso 1, 2*).

Sepheo sa mekete ena Iseraeleng ea khale e ne e le ho “bona sefahleho sa Molimo” (*Lipes. 42:2*). Sena se ne se bolela ho ba le boiphihlelo ba kananelo ea Molimo (*Lipes. 17:15*). Ka tsela e tsoanang, poleloana ea se-Heberu “ho batla sefahleho sa Molimo” e ne e bolela ho kopa thuso ho Molimo (*2 Likron. 7:14, Lipes. 27:8, Lipes. 105:4*). Ona ke oona moelelo oa nyolohelo ea Jesu o ho Ba-Heberu. Jesu o nyolohetse ho Molimo ka sehlabelo se phethehileng. Jesu o nyolohetse leholimong e le moeteli ho ea kapele ho boteng ba Molimo (*Ba-Heb. 6:19, 20*). O phethile tšepiso e etselitsoeng balumeli ba leng leetong la ho “batla lehae,” le ho lakatsa “lefatše le fetisang ka molemo” ba batla “motse oo mothei le mohahi oa oona e leng Molimo” (*Ba-Heb. 11:10, 13–16*).

Hape, hobaneng ha taba ea seo Kreste a re etselitseng sona, e seng feela sefapanong empa le seo a ntse a se etsa leholimong, ho u nee tiisetso ea poloko?

Memo ea Molimo

Bala Ba-Heberu 12:18–21. Boiphihlelo ba Iseraele e bile bofe Thabeng ea Sinai?

Ha Molimo a bitsa Iseraele ho tsoa Egepeta, morero oa Hae e ne e le ho ba le kamano e tebileng le bona. O ile a re, “Le bone seo ke se entseng ho ba-Egepeta, le kamoo ke le pepileng kateng, ka mapheo a ntsu, ka le tliša ho ‘na’” (*Exod. 19:3, 4*).

Ka mokhoa o joalo, Molimo a fana ka litaelo tse hlokehang ka Moshe ho lokisetsa sechaba ho kopana le Eena. Sechaba se ne se lokela ho ithoekisa pele (*Exod. 19:10–15*). Ba neng ba ka nyoloha ba sa itokisa ba ne ba tla shoa. Leha ho le joalo, ha sechaba se ne se itokisitse ka matsatsi a mabeli, e be “‘ha torompeta e lla’” ka letsatsi la boraro, Molimo oa laela hore sechaba “‘ba tle ba tle thabeng’” (*Exod. 19:13*). O ne a batla ba be le boiphihlelo boo Moshe le baetapele ba sechaba ba tla ba le bona ha ba nyolohetse thabeng ‘me “ba bona Molimo ‘me ba e-ja, ba e-noa’” boteng ba Hae (*Exod. 24:9–11*). Batho ba hlokomela hamorao hore ba bone khanya ea Molimo le hore Molimo o ka bua “‘le motho , ‘me motho a phela’” (*Deut. 5:24*). Empa, ha nako e fihlile, ba hloka tumelo. Moshe a hlalosa lilemo hamorao: “le ne le tšaba mollo; ‘me ha lea ka la hloa thabeng’” (*Deut. 5:5*). Ho e-na le hoo, ba ile ba kopa Moshe ho kena lipakeng bakeng sa bona (*Deut. 5:25–27, bapisa le Exod. 20:18–21*).

Molimo ha a itlhalisa ho sechaba ka khalalelo ea Hae thabeng ea Sinai e ne e le ho ruta sechaba hore se tle se ithute ho “tšaba,” kapa ho mo hlompha. Ho “tšaba Jehova” ho atisa litšiu, hlalefo, hlomphe (*Deut. 4:10; bapisa le Lipes. 111:10, Liprov. 1:7, Liprov. 9:10, Liprov. 10:27*)—le ho ithuta hore o mohau o lereko (*Exod. 34:4–8*). Joale, ha Molimo a ne a batla Iseraele e tle ho Eena, batho ba tšaba ‘me ba kopa Moshe ho ba ‘muelli oa bona. Tlhaloso e ho Ba-Heberu ea liketsahalo tsa Sinai e latela ha Moshe a hopotsa sechaba ho hloka tumelo ha bona le bokoenhi ba bon ka ho etsa namane ea khauta, le kamoo a neng a tšaba ho kopana le Molimo ka lebaka la sebe sa bona (*Deut. 9:19*). Boitšoarō ba sechaba e ne e se seo Molimo a neng a se rerile ka bona; ho na le hoo, e ne e le tholoana ea ho hloka tumelo ha bona.

Ka lebaka la Jesu, hobaneng re sa lokela ho tšaba ho atamela Molimo? Leha ho le joalo, liphelelo tsa ho tseba ho atamela ke li fe?

Tlhoko ea Lesira

Masira a na le mesebetsi e ‘meli. Lentsoe leo Ba-Heberu e le sebelisang bakeng sa lesira (*katepetasma*) le ka supa lesela le lepeletseng la lebala (*Exod. 38:18*), lesela le lepeletseng le monyako oa phaposi ea pele ea sehalalelo (*Exod. 36:37*), lesira le neng le arola sehalalelo le sehalaleliso (*Exod. 26:31–35*). Masira ana ka bobeli e ne e le menyako le meeli e neng e ka tšelo ka batho ba bang feela.

Bala Levitike 16:1, 2 le Levitike 10:1–3. Re fuoa tlhokomeliso efe litemaneng tsee?

Lesira e ne e le sireletso ea baprista ha ba ntse ba sebeletsa kapele ho Molimo o halalelang. Kamor’a sebe sa namane ea khauta, Molimo a re ho Moshe ha a na tsamaea le bona tseleng e eang Lefatšeng la Pallo e se re mohlomong a ba timetsa kahobane e ne e le “sechaba se melala e satalletseng” (*Exod. 33:3*). Joale, Moshe a tlosa tente ea pokano ea ea e hloma hojana, kantle ho lihelo (*Exod. 33:7*). Leha ho le joalo, kamor’a hore Moshe a babuelle, Molimo a lumela ho tsamaea le bona a le har’a bona (*Exod. 33:12–20*), empa a fana ka mehato e mengata ho sireletsa sechaba ha a ntse a lula har’a bona.

Mohlala, Iseraele e ne e hloma metlotloane ka tsela e laolehileng e neng e etsa sebaka se khutlo li ‘ne se se nang letho bohareng moo teng ho neng ho hlongoa tabernakeke. Ho tlatsetletsa moo, ba-Levi ba ne ba hloma metlotloane ea bona ba pota-potile tabernakele e le ho e sireletsa le thepa ea eona khahlanong le balichaba ba neng ba ka kena-kenana le eona (*Num. 1:51, Num. 3:10*). E ne e le mofuta oa lesira oa batho o neng o sireletse sechaba sa Iseraele: “Empa ba-Levi bona ba tla bofolla ka mathokong ohle a tabernakele ea bopaki hore khalefo ea ka e tle e se ke ea tukela phutheho ea bana ba Iseraele; ba-Levi ba tla boloka tabernakele ea bopaki” (*Num. 1:53*).

Jesu, Moprasta oa rona, le Eena ebile lesira la rona. Ka ho tsoalo ea Hae nameng, Molimo o ile a hloma tente ea Hae kahare ho rona ‘me a etsa hore ho be bonolo ho rona ho nahana ka khanya ea Hae (*John 1:14–18*). O ile a etsa hore ho be bonolo hore Molimo ea halalelang a phele kahare ho batho ba sa phethehang.

Nahana ka se boleloang ke hore Molimo ‘Mopi, Eena ea entseng tsohle tse bopiloeng, a ka lula har’a sechaba sa Hae, bao ka nako eo e neng e le mak-hoba a palehong. Se se re ruta eng ka kamoo Molimo a ka bang haufi le rona kateng?

Tsela e Ncha e Phelang e Fetang Lesireng

Bala Ba-Heberu 10:19–22. Re fuoa memo e fe litemaneng tsee?

Buka ea Ba-Heberu e re Jesu o kene sehalalelong sa leholimo ‘me o re memela ho mo sala morao. Taba ena e lumellana le taba e ileng ea tekoa pele ea hore Jesu ke “moetelli” oa balumeli. (*Ba-Heb. 2:10; Ba-Heb. 6:19, 20; Ba-Heb. 12:2*). “Tsela e ncha e phelang” ke selekane se secha seo Jesu a se hlomamisitseng ka sehlabelo sa Hae le nyolohelo. Poleloana “e ncha e phelang” e fapana le tlhaloso ea selekane sa khale “ntho ea mokhulela e tsofetseng” (*Ba-Heb. 8:13*). Ke selekane se secha se faneng ka tsoarelo ea libe hape sa bea molao lipelong tsa rona, se etsang hore ho be bonolo hore re atamele Molimo ka sebete, e seng ka lebaka la rona kapa eng kapa eng eo re e entseng, empa e le feela ka lebaka la seo Jesu a re etselitseng sona ka ho phetha joalo lipehelo tsa selekane.

Ba-Heberu e tsoaile taba ea hore tlhomamiso ea selekane sa khale e ne e kenyelletsa tlhomamiso ea sehalalelo le tlhoekiso ea baprista (*Ba-Heb. 9:18–21; bapisa le Exoda 40; Levitike 8, 9*). Sepheo sa selekane seo e ne e le ho etsa kamano e haufi ea mahareng a Molimo le sechaba sa Hae (*Exod. 19:4–6*). Ha Iseraele e amohela kamano ena, hang Molimo oa laela hore ho aho sehalalelo hore a tle a lule har’a bona. Tlhomamiso ea sehalalelo le boteng ba Molimo har’a sechaba sa Hae e motsotsong oo selekane se mahareng a Molimo le Iseraele se phethoe.

Ho sa le joalo le ka selekane se secha. Selekaneng se secha le sona se bolela hore bobebeletsi ba boprista ba Jesu bakeng sa rona (*Ba-Heb. 5:1–10, Ba-Heb. 7:1–8:13*).

Nyolohelo ea Jesu kapele ho Molimo e ne e hlomamisa mongoaha o mocha bakeng sa sechaba sa Molimo. Sakaria 3 e bontša hore Satane o ne a le kapele ho boteng ba Molimo ho ea nqosa sechaba sa Molimo, ba neng ba emetsoe ke Joshua moprista e moholo. Eena monqosi enoa ke ea neng a bee liqoso ka botšephehi ba Jobo ho Molimo (*Jobo 1, 2*). Ka sehlabelo sa Jesu, leha ho le joalo, Satane o lelekiloe leholimong (*Tšen. 12:7–12, bapisa le Johanne 12:31, Johanne 16:11*). Joale ke Jesu ea re buellang ‘me ka sehlabelo sa Hae le botšephehi ba Hae o re kopela Topollo!

Satane a ka beha liqoso life ka uena kapele ho Molimo, haeba a ne a ka lumelloa? Leha e le raleshano, a ka bua leshano le lekae ka uena hore e le ho batla tsuo ea hau? Tšepo e le ‘ngoe feela eo u nang le eona ke e fe?

Ba Tla Bona Sefahleho sa Hae

Bala Ba-Heberu 12:22–24. Ke ka mokhoa ofe re tšileng Jerusalema oa leholimo boteng ba Molimo?

Ho thoe balumeli “ba tile” Thabeng ea Sione, Jerusalema oa leholimo, ka tumelo. Ka tsela ena, boiphihlelo ba bona bo lebelletse bokamoso ka mokhoa o joalo, Jerusalema oa leholimo o boemong ba lintho “tse lebelletsoeng” le “tse sa bonoeng” tseo leha ho le joalo re li tiiselitsoeng ka tumelo (*Ba-Heb. 11:1*).

Leha e le ‘nete, ona ha se moelelo o felletseng oa temana eo. Re boetse re tile Thabeng ea Sione, kapele ho boteng ba Molimo, Jesu ke moemeli oa rona (*Ba-Ef. 2:5, 6; Ba-Kol. 3:1*). Nyolohelo ea Jesu ha se taba ea tumelo, empa ke ea ‘nete. Ke lehlakore lena la nalane la nyolohelo ea Jesu le re fang matla a susumetsang ho khotatso ea Ba-Heberu ea ho tšoara ba tiise kano ea rona (*Ba-Heb. 4:14, Ba-Heb. 10:23*). Pauluse o re: “Ereka ha re e-na le moprista e moholo ea nang le boholo bo bokalo, . . . ea phollelitsoeng ka maholimo, . . . a re atameleng ka tšepo” (*Ba-Heb. 4:14, 16*).

Ka mokhoa o joalo, re se ntse re tile ka moemeli oa rona ‘me, ka baka leo, re lokela ho itšoara ka mokhoa o tšoanelang. Ka Eena, re ba lekileng neo ea leholimo . . . ba latsoitseng lentsoe le monate la Molimo, le matla a bophelo bo tlang ho tla” (*Ba-Heb. 6:4, 5*). Bonnete ba nyolohelo ea Jesu le bosebeletsi ba Hae sehalalalong sa leholimo ke “ankora ea moea, e tieang” (*Ba-Heb. 6:19*), tiisetso ea hore litšepiso lia tšoareha ‘me li lokeloa ke ho tšeptjoa (*Ba-Heb. 7:22*). Ho rona, tumelo e na le ankore ea nalane.

Morero oa Molimo ha o na ho phethoa ka Jesu feela, empa le ka rona. Re ‘nile ra re nyolohelo ea Jesu e phethile papiso ea mekete e ‘meli ea Iseraele, Paseka le Pentakonta. Ho latela Ba-Heberu le buka ea Tšenolo, mokete oa ho qetela, Mokete oa Mangata, o sa ntse o tla phethoa. Re tla o keteka le Jesu, ha re le “motseng . . . oo Molimo e leng mohahi le mothei oa oona,” lehaeng le leholimong (*Ba-Heb. 11:10, 13–16*). Ha re na hloma metlotloane, empa motlotloane oa Molimo, o tla theoha leholimong, ‘me re tla phela le Eena ka ho sa feleng (*Tšen. 7:15–17; Tšen. 21:1–4; Tšen. 22:1–5; Num. 6:24–26*).

Re ka etsa joang hore tšepiso ea bophelo bo sa feleng e be taba ea ‘nete ho rona hona joale, har’a lefatše le tletseng bohloko le mahlomola? U ka fana ka karabo e feng ho ba reng taba ena empa e le tšomo feela e re thusang ho iikutloa hamonate ka ho fetisa ka bophelo ba rona moo le hona joale?

Ho Ithuta Haholoanyane: “Nyolohelo ea Kreste leholimong e ne e le letšoao ho balateli ba Hae la hore ba tla fumana tlhohonolofatso eo ba e tšepisitsoeng. Ba ne ba lokela ho emela sena pele ba ka kena mosebetsing oa bona. Ha Kreste a kena ka likhoro tsa leholimo, o ile a hlomamisoa kapele ho manyeloi a neng a mo khumamela. Hang hoba tšebeletso ena e fele, Moea o Halalelang oa theohela holim’a barutuo ka likhororo tse matlahali, ‘me Kreste o ile a feela a tlotlisoa, le ka khanya eo a neng a e-na le eona le Ntate ho tloha bosahlaheng. Tšollelo ea Pentakonta e ne e le ha leholimo le fetisa molaetsa oa hore tlhomamiso ea Jesu e phethiloe. Ho latela tšepiso ea Hae, o ne a rometse Moea o Halalelang ho balateli ba Hae e le sesupo sa hore, joalo ka moprista le morena, o amohetse matla ‘ohle leholimong le lefatšeng, ‘me e ne e le Motlotsuoa holim’a sechaba sa Hae. . . .

“Ba se ba ka bua ka lebitso la Jesu ka sebetse; a na e ne e se Motsoalle oa bona le Moholoane oa bona? Ka ho atametsoa haufi le Kreste, ba lula le Eena sebakeng sa maholimo. Ha ba ntse ba paka ka Eena ba ne ba sebelisa mantsoe a kubellang!”—Ellen G. White, *The Acts of the Apostles*, maq. 38, 46.

Lipotso tsa Puisano:

- ❶ Mopesaleme o re: “Moea oa ka o nyoretsoe Molimo, Molimo o utloang. Ke tla ea neneng, ke be ke itlhahise pel’a Molimo?” (*Lipes. 42:2*). Re ka ba le lenyora le tšoanang joang la ho itlhahisa pel’a Molimo? Haeba re sitoa ho thabela ho ba pel’a Molimo ha re ntse re mo khumamela ‘me re tla kapele ho Eena ka tumelo hona joale, a na re tla thaba kamoso? Ke lintlha life tse tlisang thabo kapele ho Molimo?
- ❷ Bukeng e somang tumelo, ba bang ba ile ba etsa roboto e neng e le eona e lumelang bakeng sa rona. Leha hona e ne e le bosaoana, re ka ba hlokolosi joang hore re se etse joalo ka Iseraele lefeelleng, e leng ho batla ba kenang lipakeng tsa rona le Molimo? Re sekamela ho batleng hore batho ba bang ba bale Bibe le bakeng sa rona ba be ba re fumanele mahakoe a ‘nete ka Bibeleng. Batho ba bang ba ka utloa e ka thapelo tsa ba bang bakeng sa bona li ka ba le matla a fetisang a tsa bona kapele ho Molimo. Re ka qoba leraba lee la moea joang? Hobane ka lebaka la Jesu, re ka atamelang Molimo re sa hloke motho e mong osele?
- ❸ Ba-Heberu e lutse holim’a tiisetso ea Topollo. Leha ho le joalo, ke joang re lokelang ho ba hlokolosi hore re se etse phoso ea fapanya mohopolo le taba?